



Matagaluega o Tupe
MALO O SAMOA

SAUNOAGA O LE TALA FA'ATATAU AUTŪ O LE TUPE 2025/2026

“Samoa, tula’i maia! O le tatou sa folau e fau tele. O lenei Tala o le Tupe mo le manuia o tagatanuu uma, sa ta’ialaina i futia ua sola, ina ia fa’amaua’a ai le asō, ma fa’amausalī ai se lumana’i mo a taeao”

Hon. Mulipola Anarosa Ale Molio’o
MINISITA O TUPE

06 Oketopa 2025

FA'ASOLOGA O MATAUPU

I. TAUNUUGA O LE TAMAOAIGA	1
II. VAAIGA TAULAI O LE TAMAOAIGA.....	7
III. FA'AVAE O LE TALA O LE TUPE	8
IV. TA'IALA O LE TALA O LE TUPE.....	9
V. OTOOTOGA O LE TALA O LE TUPE.....	15
VI. FA'AVAE O TUPE MAUA.....	16
VII. GALUEGA FA'ATINO MA ATI'INA'E O LO'O AVE IAI LE FA'AMUAMUA.....	17
VIII. TUPE FA'AALU LĒ FUAFUAINA	23
IX. TUPE ALU I ATIINA'E	24
X. UPU FA'AI'U	25

SAUNOAGA O LE TALA FA'ATATAU AUTŪ O LE TUPE

2025/2026

Lau Afioga i le Fofoga Fetalai,

E tusa ai ma le Tulafono Tumau 131, e ia te a'u le ava tele e fai ai ma sui o le Malo, ou te tu'uina atu ai i luma o le laulauāfono a le Palemene, le Tala Fa'atatau Autū o le Tupe 2025/2026.

E muamua pea ona si'i le vi'iga ma le fa'afetai i le Tāmā oi le lagi mo ana fa'amanuiaga mo Samoa ma ona tagata, aemaise o lana ta'ita'iga o lenei folauga ina ia mautū ma mausalī le tamaoaiga, mo nei ma a taeao.

O le fa'amuumua o lenei folauga tau i atiina'e, o lo'o ave lava i o tatou tagatanuu ma aiga. E amata mai lava i le fai fa'atoaga i Savaii, i le fa'atau oloa i le maketi, faapea faiaoga o lo'o a'otauina alo ma fanau. O lea, o le Tala o le Tupe lenei o se feagaiga i le va o le Malo ma ona tagata, poo le va o matua i le asō ma fanau i le lumana'i.

I. TAUNUUGA O LE TAMAOAIGA

Lau Afioga I le Fofoga Fetalai,

E avea lenei avanoa, ou te 'oto'otoina atu ai ni isi o atiina'e ma tulaga na ausia i le fa'atinoina o le Ta'iala mo le Lumana'i Manuia o Samoa 2021/2022 - 2025/2026, talu ona fa'atinoina e o'o mai i le tausaga fa'ai'u lenei;

Siitia ole Tamaoaiga

- I le mae'a ai o tausaga soso'o e lua o pa'ū le tamaoaiga talu ai a'afiaga o le KOVITI-19, na toe fa'atupula'ia le tamaoaiga o Samoa i le tausaga fa'aletupe 2021/22, i le tusa lea ma le 2.3 pasene. O le fa'amanatuina o le 60 tausaga o le tūto'atasi o Samoa lea na amata ia luni 2022 e o'o atu ia Me 2023, na fa'amaui ai le si'itia maua o le tamaoaiga i le 15.2 pasene i le tausaga fa'aletupe 2022/23, ma fa'ailo ai le vave ona toe fa'atupula'ia o le tamaoaiga. I le tausaga fa'aletupe 2023/24, na amata ai ona telegese le fa'atupulai'a o le tamaoaiga i le 4.8 pasene, ae o le tausaga foi lea

na ausia ai mo le taimi muamua le aofa'iga o le tamaoaiga (nominal GDP) i le \$3.0 piliona talā. I le tausaga fa'aletupe 2024/25, na siitia ai le tamaoaiga o Samoa i le 4.2 pasene, ma ua atagia ai le fa'atumauiina pea o le fa'atupulaia o le tamaoaiga e ui sa iai ni aafiaga mai le motusia ma le tau fa'asoasoina o le eletise.

- O le fa'amaite ale Malo i le Polokalame mo le Atiina'e o Itūmalo, ua fa'amauiina ai le sao taua o lenei Atiina'e ile si'itia maua luga ai ole tamaoaiga, e ui i le tele o lu'itau i lona fa'atinoina. O lenei polokalame sa maua ai avanoa mo aoaoga a alo ma fanau e taua atu i le totogiina o piliaoga, galuega fa'aleleia mo aoga amata fa'apea le si'itia o le tumama lautele e taua atu ile faaleleia o fale-le-taua mo aoga tulaga lua ma kolisi faa-itumalo ile tele o nuu ma alalafaga. Sa fa'apea foi ona maua le fesoasoani mo le atiina'eina o pisinisi laiti, o le fa'atauina o oloa ma meafaigaluega mo fa'ato'aga ma faiga faiva, fa'apea le fausia o auala gālue aga'i i fa'atoaga. I tua atu o tupe sa fa'aaaogaina i le Polokalame mo le Atiina'e o Itumalo, o lo'o atagia ai taumafaiga e una'ia le atiina'eina o nu'u ma afioaga ina ia maua avanoa tutusa, ma fa'aitiitia ai le tulaga ma'ale'ale o le soifuaga.
- E le gata i lea, e telē se sao ale Malo ile atiina'e ole Vaega Tumaoti sa taua atu ile Vaega Tutotonu mo Pisinisi lea sa nafa ma le fa'afoeina o le fesoasoani fa'ameaalofa e tusa ma le \$9.0 miliona talā, talu mai le Tausaga Faaletupe 2022/2023. O lenei fesoasoani sa fa'amanuiaina ai pisinisi laiti e tusa ma le 500. Sa fa'aaoga fo'i le Faletupe mo Atiinae o Samoa e fa'au'i atu ai le \$11.0miliona talā mo nonogatupe e mama tu'utu'uga ma tului. O lenei fo'i fesoasoani ale Malo sa fa'amanuiaina ai pisinisi e 110.
- Ina ia fa'aleleia le atina'eina o le soifuaga lautele, na si'itia e le Malo le penisiona i le \$200 talā, ma amatalia le fa'amanuiaga e \$100 talā i le masina mo i latou e iai manaoga tumau o le soifua i le tausaga fa'aletupe 2021/22. O nei fesoasoani mo i latou e pito sili ona ma'ale'ale le tulaga o le soifuaga, ua mafai ai ona fa'aleleia le fa'atinoina o a latou fa'asoa, ma fa'atupula'ia ai le tamaoaiga.
- Na fa'atauina e le Malo e taua mai i fesoasoani a ana Paaga mo atiina'e, se masini fa'ata mo pusa oloa, le va'a toso va'a, fa'apea le va'a a leoleo mo le puipuiga o le gataifale, ina ia si'itia ai le malupuipua o tuāoi fa'avāomālo a Samoa, ma fa'afaigofieina ai auala o fefa'atau'iga.

Tau ole Soifuaga

- Ua tu'uitiitia le tau o le soifuaga (Inflation) i le tusa lea ma le 3.6 pasene i le tausaga fa'aletupe 2023/24, mai i le tulaga maualuga sa iai i le tausaga fa'aletupe 2022/23, lea na o'o atu ile 12 pasene ma le 8.8 pasene sa iai i le tausaga fa'aletupe 2021/22. Mo le tausaga fa'aletupe 2024/25, sa faamauina le toe pa'ū atili o le tau o le soifuaga i le 1.8 pasene ona o a'afiaga mai isi atunu'u o le lalolagi.
- Ona o aafiaga ole maualuga o le tau ole soifuaga, o lea na fa'atinoina ai le Fetu'una'iga o Totogi mo le Tau o le Soifuaga mo tagata faigaluega a le Malo, i le tausaga fa'aletupe 2023/24 ma le 2024/25.
- Sa fa'apea foi ona si'itia le totogi maualalo (minimum wage) mai le \$3 talā i le \$4.84 sene, lea sa fa'atino auaua'i ma si'itia ai i le \$4 talā ia lulai 2024 ma toe si'itia i le \$4.84 ia lulai 2025.

Tupe Fa'aagaga i Atunuu i Fafo

- O lo'o fa'atūmauina pea le maualuga o a tatou tupe fa'aagaga i atunu'u i fafo (Foreign Reserves), lea na si'itia mai le \$0.8 piliona talā i le tausaga fa'aletupe 2021/22, i le \$1.1 piliona talā i le tausaga fa'aletupe 2022/23. E \$1.4 piliona talā na fa'atupulaia ai i le tausaga fa'aletupe 2023/24, ma toe si'itia ai ile \$1.6 piliona talā ile tausaga fa'aletupe 2024/25.
- O le uiga o lenei tulaga lelei, e 10.9 masina o oloa mai fafo na mafai ona fa'atupe i tupe fa'aagaga i le tausaga fa'aletupe 2021/22 ma le 2022/23, ma si'itia ai i le 13.4 masina i le tausaga fa'aletupe 2023/24. Na fa'aauau pea le si'itaga ile 15.2 masina o oloa e fa'atauina mai fafo ile tausaga fa'aletupe 2024/25.
- I le masina o Me 2023, na ausia ai e Samoa mo le taimi muamua le \$1.0 piliona talā o ana tupe fa'aagaga i atunu'u i fafo. Ma o se matati'a tele lea na ausia i le vaitaimi tonu sa fa'amae'aina ai le fa'amanatuina o le 60 tausaga o le tūto'atasi o Samoa.

Tupe Faamomoli Mai Fafo

- O lo'o fa'aauau pea le si'itia o tupe fa'amomoli mai fafo talu mai le tausaga fa'aletupe 2021/22 lea sa fa'amauina ai le \$732.2 miliona

talā. E \$832.1 miliona talā sa lipotia mo le tausaga fa’aletupe 2022/23, \$877.0 miliona talā mo le tausaga fa’aletupe 2023/24, ma o’o atu ai le maualuga i le \$900.6 miliona talā ile tausaga fa’aletupe 2024/25. O lo’o atagia ai le maoa’e o le fesoasoani mai pea o a tatou tamafanau o lo’o aumau i atunu’u i fafo, aemaise o a tatou tagata o lo’o auai atu i galuega fa’avaitaimi.

- O le fa’amaonia ai o le Faiga Fa’avae mo Galuega Fa’avaitaimi ia Aukuso 2023, ua si’itia ai e le Malo avanoa mo tagatānu’u a Samoa e auai atu ai i galuega fa’avaitaimi i Ausetalia ma Niu Sila, I le ta’l 6000 I le atunuu. Ae peita’i, e tele lu’itau sa feagai ma le faatinoina o nei polokalame e le’o mafai ai lava ona ausia e Samoa fuainumera faatapulaaina I totonu o le Faiga faavae. I le tulaga o fa’amaumauga, na si’itia mai le 5,634 i le tausaga fa’aletupe 2021/22, i le 8,336 i le tausaga fa’aletupe 2022/23, i le 9,812 i le tausaga fa’aletupe 2023/24, e aofia ai ma e o lo’o galulue fa’avaitaimi i Amerika Samoa. Mo le tausaga fa’aletupe 2024/25, e na o le 6,358 tagata galulue faavaitaimi sa faamauina mo Niu Sila ma Ausetalia. E ui I itu lelei o le polokalame, I le fa’atupula’ia o tupe fa’amomoli mai fafo, fa’atasi ai ma le atina’eina o le tomai ma agava’a o a tatou tagatanuu, e manatu le Malo e ao ona toe lloilo toto’a lenei Faiga Fa’avae ona o le tele o lu’itau.

Tagata Tafafao Maimoa Mai Fafo ma Tupe Maua

- Sa telē le a’afiaga o le Vaega Maoti o Tagata Tafafao Maimoa i le tapunia ai o faigamalaga fa’ava-o-malo, lea na fa’atoā tatala ia Aukuso 2022, ma fa’amauina ai le aofa’iga o tagata tafafao maimoa mai fafo i le 124,655, atoa ai ma tupe maua e \$421.01 miliona talā. Na si’itia i le tausaga fa’aletupe 2023/24 le fuainumera o tagata tafafao maimoa mai fafo i le 175,656, fa’apea tupe maua mai tagata tafafao maimoa mai fafo e \$618.3 miliona talā. I le maea ai ole tausaga faaletupe 2024/25, na fa’amauina ai le fa’atupulaia pea o fuainumera o tagata tafafao mai fafo ile 189,937 atoa ma tupe maua mai ai e \$678.1 miliona talā. Ma o lenei aofa’iga o tupe maua ua maualuga atu nai lo’o le \$542.5 miliona talā sa fa’amauina i le tausaga fa’aletupe 2018/19 a’o le’l aafia le lalolagi ile fa’ama’l o le Koviti.
- Sa tele se lagolago ale Malo na unaia ai le toe atinaeina ma le faaleleia o le Vaega Maoti o Tagata Tafafao Maimoa talu mai le

tausaga fa'aletupe 2021/22, e tauala atu i fesoasoani fa'ameaalofa, nonogatupe e mama tului, fa'apea le tu'usaunoaina o tiute mo atiina'e sa agavaa iai le vaega maoti. O lea sa fa'amauiina ai le si'itia ole numera o apitaga mo tagata tafafao maimoa mai fafo, ina ua fa'aopoopo ni faletalimalo fou e aofia ai le Survivor Samoa Resort, o le Mulifanua Beach Resort, o le La'imoa Hotel, fa'apea ma le toe tatalaina o le Sheraton Samoa Aggie Grey's Hotel and Bungalows i Apia.

- O le si'itia o le tamā'o'aiga mai le fa'alauteleina o galuega fa'atino tau tagata tafafao maimoa i totonu o nu'u ma afio'aga, sa aofia ai galuega fa'aleleia mo mata'aga fa'alēnatura, fa'aleaganu'u, ma tala fa'asolopito o Samoa, i se aofa'iga e 57.
- Sa galulue so'oso'otauau fo'i le Malo ma nu'u ma afioaga i le fa'atinoina o le Polokalame mo le Fa'amatagofieina o Aai, lea sa mata'ina i le vaitau o le Fonotaga a Fa'auluuluga o Malo o le Taupulega, ia Oketopa 2024.
- I le tulaga o le ave fu'a a si o tatou atunuu, le Samoa Airways, sa telē se galuega na fa'atinoina i le 3 tausaga ua mavae, e toe fa'atulaga ai aitalafu ale Kamupani fa'apea le fa'agaioiga. E oo mai ile fa'aiuga ole tausaga fa'aletupe 2024/25, ua paū maualalo le aofaiga o aitalafu mai le \$80 miliona talā sa fa'amauiina ia luni 2022 I le \$10 miliona talā. Na mafai ona ausia lenei tulaga lelei ona sa fa'aaogaina le fa'amalumaluga a le Malo sa iai (e tusiesea ai mai tusi ale Kamupani, le \$55 miliona talā o le aitalafu sa ile UTOS ae togitogi sao e le Malo), fa'apea fesoasoani tau tupe sa tuuina atu mai le Tala o le Tupe a le Malo. Sa fa'amauiina foi se siitia maualuga o le sao (equity) I le \$33 miliona talā, pe a fa'atusatusa atu ile paū e \$54 miliona talā sa iai ia luni 2022, o se siitaga e \$87 miliona talā. I le tulaga o tupe mama (net profits after tax), e \$87 miliona talā foi sa ausia I le 3 tausaga e oo mai ia luni 2025, pe a fa'atusatusa lea ile gau e \$93 miliona talā sa iai ile 5 tausaga I luma atu o le 2022. O lea tulaga maoa'e na mafai ona ausia I nei tausaga e 3, ua mautinoa ai le maua'a ma le mausalī o le talitonuga a le Samoa Airways ma le Malo, I le sao taua o le va'alele I le una'ia o le tamaoaiga o Samoa, ma sa le fa'avaivai ai ao telē se a'afiaga tau tupe o le Kamupani.

Aofai o Tagata Faigaluega

- Na fa'aauau pea ona fa'atupulaia le aofai o tagata faigaluega talu mai le tausaga fa'aletupe 2021/22 mai le 96,721 i le 98,764 i le tausaga fa'aletupe 2022/23, ma toe si'itia i le 103,898 i le tausaga fa'aletupe 2023/24. I le tausaga fa'aletupe 2024/25, na faamauina ai le 104,976 o le aofaiga o tagata faigaluega, ma atagia ai le fa'atupula'ia pea o avanoa faigaluega i totonu o Samoa.
- E 153 ni avanoa faigaluega sa mafai ona maua ina ua fa'avaeina Ofisa a Itumalo e 51 i lalo o le Polokalame mo le Ati'ina'e o Itumalo. Sa una'ia ai foi polokalame fa'alea'oa'oga i totonu o nu'u ma afioaga, e aofia ai a'oa'oga tau su'isu'i, faiga fa'atoaga, faigāfaiva, ma le kamuta. O ni isi o fesoasoani sa fa'apea ona fa'atino sa tauala atu lea mo pisinisi laiti, atoa ai ma le fesoasoani e amatalia ai pisinisi sa fa'amanuiaina ai autalavou i nu'u ma afioaga e 66.

Oloa e auina atu i fafo

- Na fa'apea fo'i ona si'itia le tau aofa'i o oloa e auina atu i fafo mai le \$82.9 miliona talā ile tausaga fa'aletupe 2021/22, i le \$119 miliona talā i le tausaga fa'aletupe 2022/23, ae tu'uititia i le \$104.4 miliona talā i le tausaga fa'aletupe 2023/24, ona o a'afiaga i fefa'ataua'iga i le lalolagi. Peitai, na toe si'i atu ile \$105 miliona talā ile tausaga fa'aletupe 2024/25.
- O oloa masani a Samoa o olo'o auina atu i fafo e aofia ai i'a, suā'u popo, ma le talo. O lo'o fa'aauau ai pea e le Malo galuega ati'ina'e iā tatou auala mo femalaga'iga, ina ia mautinoa le saogalemu mai aafiaga i suiga o le tau. O nei atiina'e e ogatasi ma galuega fa'aleleia i auala gālua i fa'ato'aga, o lo'o fa'atupeina i lalo o le Polokalame mo Ati'ina'e o Itumalo, ina ia fa'aleleia ma fa'afaigofieina auala o fefa'ataua'iga mo a tatou oloa tau fa'ato'aga e auina atu i fafo. Sa lagolagoina fo'i e le Polokalame mo le Atiina'e o Itūmalo ia pisinisi a le au faifaiva i nu'u ma afioaga.

Aitalafu a le Malo

- O lo'o fa'amauina le fa'aititia pea o tulaga o aitalafu a le Malo talu mai le tausaga fa'aletupe 2021/22, e pei ona atagia i le pa'ū o le aofaiga o aitalafu i le \$760.4 miliona talā i le tausaga fa'aletupe

2024/25 - o se tu'uitiitiga e tusa ma le \$189.1 miliona talā. A fa'atusa i le tamaoaiga, ua tele se fa'aitiitiga mai le 41 pasene i le tausaga fa'aletupe 2021/22, i le 31.8 pasene i le tausaga fa'aletupe 2022/23, ma toe fa'aitiitia ile 25.2 pasene i le tausaga fa'aletupe 2023/24, ae oo mai ai ile maualalo e 21.2 pasene ile tausaga fa'aletupe 2024/25.

Lau Afioga ile Fofoga Fetalai,

- Mo le silafia e lau afioga ma le mamalu o le Palemene, e ono ni nonogatupe ua maea ona totogiina ele Malo talu mai le tausaga faaletupe 2021/22 ile 2024/25. E lima nonogatupe mai faletupe I fafo atu o Samoa, e aofia ai le tolu mai ile Faletupe o Atiinae o Asia, tasi mai le Faletupe ole Lalolagi ma le tasi mai le Faalapotopotoga O Atunuu o Lo'o Fa'ataueseina le Suauu (OPEC). E tasi le nonogatupe I totonu o Samoa mai ile Faaputugatupe Teufaafaigaluega o Mavaega Tausi a Samoa (UTOS), mo le aitalafu a le Fa'alapotopotoga o Esetete Tausi a Samoa (STEC) ua mae'a ona totogiina.

II. VAAIGA TAULAI O LE TAMAOAIGA

Lau Afioga i le Fofoga Fetalai ma Sui Usufono,

E tusa ai ma le Lipoti o le Va'aiga Taula'i mo le Tamaoaiga o le Lalolagi a le Fa'alapotopotoga o Fa'aputugatupe a le Lalolagi ia Iulai 2025, e ono fa'aitiitia le fa'atupula'ia o le tamaoaiga o le lalolagi i le 3.0 pasene i le 2025, ma le 3.1 pasene i le 2026, ona o lu'itau i tulaga tau tupe, fete'ena'iga fa'avaomalo, tulaga lē mautonu o faiga fa'avae, fa'apea le ono si'itia maualuga o le tau o oloa. I le itulagi o le Pasifika, o lo'o fa'apea fo'i ona maitauina le telegese o le si'itia o le tamaoaiga o atunu'u o le Pasifika, ona o le toe fo'i o tamaoaiga o nisi o atunu'u i lona tulaga masani mai le tulaga maualuga sa iai ina ua mae'a le fa'ama'i o le KOVITI, atoa ai ma lu'itau fa'alotoifale fa'apea le tulaga ma'ale'ale o atumotu laiti, mai i a'afiaga mai fafo.

Mo Samoa, o lo'o fuafua e fa'atupula'ia le tamaoaiga i le tausaga fa'aletupe 2025/26 ile 4.5 pasene, e tusa lea ma le fa'amae'aina o taunu'uga sa fuafuaina i le Ta'iala mo le Lumana'i Manuia o Samoa, e ala

i le fa'atinoia o fa'amaite a le Malo, aemaise le si'itia o vaega tupe mo le fa'aauauina o le Polokalame mo le Atiina'e o Itūmalo, o le toatele o tagata faimalaga mai mo le Palota Tele ia Aukuso 2025, fa'atasi ai ma le fa'atinoia o poloketi o lo'o fesoasoani mai ai a tatou paaga mo atiina'e.

III. FA'AVAE O LE TALA O LE TUPE

Lau Afioga I le Fofoga Fetalai ma Sui Usufono,

O le Tala Fa'atatau Autu o le Tupe 2025/26, o lo'o fua i taunu'uga fa'amauiina, a'o fa'agasolo le tausaga fa'aiu o le Taiala mo le Lumanai Manuia o Samoa 2021/22 i le 2025/26, lea sa limata'ita'iina ai le fa'atinoga o fa'ama'ite a le Malo, i le fa tausaga ua mavae. O lenei fo'i Tala o le Tupe o le a fa'amae'aina ai atiina'e fa'atino a le Malo i lalo o le Taiala mo le Lumanai Manuia o Samoa o lo'o iai nei, ma fausia ai se fa'avae e tapena ai le isi Taiala fou mo le ati'inae o Samoa i le isi lima tausaga o lumanai.

O le Tala Fa'atatau Autu o le Tupe o lo'o fuafuaina i le tulaga gafatia o le tamaoaiga o iai nei. E ui o lo'o mausalī le tamaoaiga, ae o lo'o fa'aauau pea le feagai o tagata Samoa ma pisinisi ma lu'itau o le tau o le soifuaga ona o tulaga lamatia o iai nei le tamaoaiga ole lalolagi. Ona o lea, ua alagatatau i le Mālō ona fa'amausali faiga faavae mo le puleaina lelei o tupe, faapea le toe unaia atili o ni taiala autū, mo le fa'ama'ite o le tamaoaiga, ina ia mautinoa avanoa tutusa mo aiga ma nuu uma o Samoa aemaise i latou e ma'ale'ale le soifuaga.

Lau Afioga i le Fofoga Fetalai,

O le Tala Fa'atatau Autu o le Tupe 2025/26 ua folasia nei i luma o le laulau a fono a le Palemene, i lana paeaiga lona XVIII, i le mae'a ai o le Faiga Filifiliga a le Atunuu ia Aukuso 2025. E ui ua fa'atuai lona tu'uina atu i luma o le Palemene, ae o lo'o fa'atumauiina pea o le Tala o le Tupe mo le tausaga atoa, mai lava ia Iulai 2025 seia pāia Iuni 2026, e pei ona maioio i lalo o le Tulafono mo le Puleaina o Tupe a le Malo 2001.

Ua aofia uma i lenei Tala Faatatau Autu o le Tupe, tupe fa'aalu i vaega uma o lo'o ave i ai le fa'amuamua, faapea ma atina'e. O lenei faiga, ina

ia mautinoa le fuafuaina lelei ma le tu'uititia o le toe fa'atinoa o se Tala Fa'atatau Fa'aopoopo o le Tupe, sei vagana ua afea Samoa i ni mala fa'alenua, fa'alavelave fa'afuase'i, po'o se fa'alavelave faa-le-soifua maloloina.

O lo'o atagia i le Tala Fa'atatau Autu o le Tupe 2025/26, fuafuaga ma faiga faavae a le Malo, mo le unaia o ati'ina'e a nu'u ma afioaga faapea le fa'amausaliina o le si'itia ai o le tamaoaiga.

E tusa ai ma vaega sa folasia, e tuuina atu lenei Tala Faatatau Autu o le Tupe i lalo o le Sini autu e fa'apea:

“Samoa, tula’i maia! O le tatou sa folau e fau tele. O lenei Tala o le Tupe mo le manuia o tagatanuu uma, sa ta’ialaina i futia ua sola, ina ia fa’amaua’a ai le asō, ma fa’amausalī ai se lumana’i mo a taeao.

IV. TA’IALA O LE TALA O LE TUPE

Lau Afioaga i le Fofoga Fetalai ma Sui Mamalu,

O le aotelega o le Tala o le Tupe ua folasia i le maota, o lo'o fa'amauiina ai le fa'asiliga o tupe alu i lo'o tupe maua, e tusa ma le 3.5 pasene o le tamaoaiga, a'o galulue pea le Malo i le fa'aauauina o le fa'atinoga o fuafuaga mo le fa'amauiina ma le fa'atupulaia o le tamaoaiga o le atunuu.

O le taiala o le Tala o le Tupe mo le Tausaga Faaletupe 2025/26, o lo'o fausia mai faiga faavae e lima o lo'o taula'i i le fa'amauiina o le tamaoaiga ina ia siitia ai le soifuaga manuia lautele ina ia o gatasi ma le Taiala mo le Lumanai Manuia o Samoa 2021/22 ile 2025/26.

E aofia ai:

1. Si'itia o Avanoa Tutusa mo Tagata Uma

O lo'o fa'amuumua pea o tatou tagata i a tatou polokalame tau atiina'e. Ma o le Polokalame o le Atiina'e o Itumalo, o le sootaga lea o fa'amuumua a le Malo ma pulega a nuu ma afioaga, e una'ia ai atiina'e fa'alotoifale. O lo'o fa'aauauina pea ona avea lenei polokalame ma faavae autu mo le fa'atuputupulaia o le tamaoagia o itumalo uma, ma e \$91.8 miliona talā ua fa'amatu'uina iai, mo lenei tausaga fa'aletupe. Ua si'itia ai lea mai le \$1 miliona tala i le \$1.8 miliona talā mo Itumalo taitasi, e fa'aatoa ai le \$5 miliona talā a le Itumalo, e tusa ai ma le fa'ataua a le Malo i lalo o le Taiala mo le Lumanai Manuia o Samoa. O lenei poloketi, o le a unaia atili ai Itumalo i le fa'atinoina o atinae talafeagai mo le latou siosiomaga, ma e atagia ai le fa'atuatuaga a le Malo i nuu ma afioaga, e mafai ona latou fa'atinoa galuega e tali atu ai i fa'afitauli fa'alotoifale. O lo'o fa'atinoina le iloiloga o le fa'ava'a mo le faiga fa'avae ma le ta'iala ina ia fa'aleleia ai le fa'atinoga o lenei polokalame taua.

O lo'o ave fo'i le fa'amuumua a le Malo i le siitia atili ai o le manuia lautele mo tagatanuu, aemaise lava i tagata matutua, ma i latou e iai a'afiaga tumau o le soifuaga. O le a amata ia Novema 2025, ona siitia le penisiona faapea le fesoasoani mo i latou e iai a'afiaga tumau o le soifua, i le \$300 talā i le masina. O lenei fesoasoani, o le a fa'amanuiaina ai i latou e tusa ma le 15,099. O lo'o fa'atino foi tapenaga mo le siitia ai o le fesoasoani mo i latou ua fitusefulu tausaga le matutua ma sili atu, mo le tausaga fa'aletupe o lumanai. O lenei fesoasoani e le gata e fa'amāmā avega i le taugata o le soifuaga, ae e fa'amausalī ai le naunauta'iga a le Malo mo le tausia o le manuia lautele.

Ua siitia foi le fesoasoani mo Fa'alapotopotoga Tumaoti faapea fa'alapotopotoga o lo'o fa'atinoina le auunaga o le tausia o tagata matutua mai le \$2.6 miliona talā i le \$8.97 miliona talā. E ta'i \$100,000 talā le fesoasoani tau tupe a le Malo mo le Mapuifagalele ma le Mapuipulotu, e amanaia ai lo latou sao taua i le tausaiaina o tagata matutua.

O lo'o fa'atuumaina pea le lagolagosua a le Malo mo le fausiaina o fale saogalemu mo aiga lima vaivai i nuu ma alalafaga. O le Polokalame mo le Fausiaina o Apitaga mo Tagatanuu lima vaivai, o le a siitia mai le \$500,000 talā i le \$1 miliona talā. E 306 aiga lima vaivai mai i nuu e 141

ua fa'amanuiaina i lenei polokalame, o lo'o galulue faipa'aga ai le Malo ma le ADRA Samoa. E \$6 miliona talā le vaegatupe o le a fa'amatu'uina fo'i e le Malo i le Faalapotopotoga o Fale a Samoa, mo nonogatupe māmā le tului a tagata lautele mo le fausiaina o latou maota.

O le a telē le siitaga o le fesoasoani a le Malo mo Fa'alapotopotoga tau Pisinisi mai le \$7.1 miliona talā i le \$23.85 miliona talā, e amanaia ai lo latou sao taua i le atinaeina o le atunu'u, ofoina o le tele o avanoa faigaluega, aemaise o le manuia lautele o tagatanuu.

O nei faiga fa'apaaga uma, e fa'amautuina ai le talitonuga maumaututū a le Malo, o le ausia o taunuuga o le atinae, e afua mai i le galulue fa'atasi, felagolagoma'i ma le fefa'asoa'i o matafaioi o vaega uma o le tamaoaiga.

2. Fa'aauppegaina o Tagata mo le Lumanai

O le fatu o so'o se atunu'u o ona tagata, ma o le tatou lumanai manuia o lo'o ta'oto i tupulaga faimai pe afai e lelei le tapenaina o lona ātina'eina. O le afuaga lea ua 'ave ai le fa'amamafa i a'oa'oga masani ma a'oa'oga fa'amatātā 'ese'ese e ala i polokalame fa'a-sikolasipi ma le fa'a-aperenitisi.

E \$10 miliona talā ua fa'aāgaga mo polokalame fa'asikolasipi a le Mālo, mo avanoa i aoaoga fa'amatātā 'ese'ese (vocational studies) e aofia ai auauaaga mo tagata tafafao maimoa mai fafo (hospitality) ma faiaoga mo aoga amata. Ua fa'aopoopo avanoa faasikolasipi mo i latou o lo'o saili fa'aailoga maualuluga i Niu Sila ma Fiti, e fa'aopoopo ai i avanoa sikolasipi ofoina mai e pa'aga mo atiina'e.

O le fesoasoani masani a le Mālo mo a'oa'oga, o le a si'itia mai i le \$18 miliona talā i le \$18.5 miliona talā, e lagolagoina ai le fa'aleleia ato'atoa o vaega o lo'o tapu'e ai le ola a'oa'oina, e aofia ai ma a'oa'oga mo i latou e iai a'afiaga tumau o le soifua. O le fa'amoemoe ia lava tapena le tulaga i a'oa'oga ina ia gafataulimaina mataupu o lo'o a'oa'oina, e aofia ai ma suiga faatekonolosi.

Ua iloiloina e le Mālo le polokalame mo le a'oa'oina o mataupu fa'a-aperenitisi, i le fa'aiti'itia lea o le tau e totogi atu e le tagata faigaluega,

mai i le 20 pasene i le 5 pasene, ae si'itia le fesoasoani a le Mālo mai i le 50 pasene i le 65 pasene. O lenei suiga, o le a fa'afaigofie ma taugofie mo tagata faigaluega, aemaise lava tupulaga talavou o lo'o tau saili fa'ailoga aloa'ia i nei matātā fa'apitoa e pei o le fa'akamuta, palama ma le fai molī. O nei fesoasoani o lo'o atagia ai Fuafulaga a le Malo mo Auaunaga Faigaluega, e faatonu folau ai lana fa'amuamua mo le atiinaeina o tomai, agavaa ma avanoa faigaluega.

O lo'o ave foi le fa'amuamua a le Malo i tulaga tau ta'alogaga mo le ātiina'eina o tupulaga, soifua maloloina ma le fiafiaga lautele o tagata. Ua si'itia le fesoasoani mai le \$2.5 miliona talā i le \$6 miliona talā, ina ia amanaia le fa'atuputupula'ia o le fiafia o fanau o lo'o 'auai atu i ta'alogaga afeleti ma asosi o ta'alogaga. Talu mai lava ona fa'avae lenei fesoasoani a le Malo i le tausaga 2022/23, ua silia ma le 50 asosi tau ta'alogaga ua fa'amanuiaina ma maua le avanoa e auai ai i ta'alogaga fa'aitulagi ma fa'a-vā-o-mālo, fa'apea ta'amilosaga e faia i totonu o le atunu'u.

O le siitia o fesoasoani faamatuina atu a le Malo mo le atiina'eina o a'oa'oga ma ta'alogaga e aofia ai avanoa sikolasipi, faaaperenitisi ma mafutaga faaleaoaoga, o se fesoasoani foi lea i le atiina'eina o le tomai ma le agavaa o tagatanu'u o Samoa.

3. Fa'alauteleina o Avanoa i Auaunaga Aupito Sili ona Manaomia mo Tagata Lautele

O le maua ai o avanoa i auaunaga taua ma aupito sili ona mo'omia, o le fa'avae lea o Atiina'e e amanaia tagata uma. O le tiute tauave o le Malo, o le fa'amautinoa lea o avanoa tutusa o tagatanu'u uma o Samoa, i nei auaunaga mo le soifua manuia ma le atiinaega o le tamaoaiga.

I le itu tau Soifua Maloloina, o lo'o faamanuiaina pea tagata Samoa i auaunaga o le tausiga muamua o le Soifua maloloina i totonu o Nu'u ma Afioaga (primary healthcare), auaunaga o tausiga ma togafitiga muamua e aofia ai falema'i fa'aitumalo (secondary healthcare), faapea ma togafitiga ma auaunaga tutotonu ma le taofia ai o gasegase (tertiary healthcare). O lea ua fa'aluaina ai le vaegatupe mo togafitiga i atunu'u i fafo i lona aofa'iga e \$12 miliona talā, ina ia mafai ai ona auina atu gasegase e lē o mafai ona togafitia i totonu o le atunu'u. O lenei

fua fuaga, o lo'o atagia ai le fa'amuumua a le Malo, i le itu tau soifua maloloina mo tagatanuu uma.

E lē o tu'umāmāina foi i le silasila a le Malo, le si'itia o le tulaga o le auaunaga ofoina atu i le atunu'u, i le itu tau suavai mamā fa'apea le malosiaga fa'aeletise, aemaise lava i afioaga ma nu'u i tua. Ua fa'amatu'uina ai le \$5 miliona talā mo le Pulega o le Suavai, fa'apea le isi \$5 miliona talā mo le Fa'alapotopotoga o Malosiaga Fa'aeletise.

O lo'o vaai taula'i fo'i le Malo i fua fuaga o atiina'e tetele, e pei ona fa'ailoa i lalo o le Polokalame Tau Atiina'e a le Malo (Public Sector Investment Program), mo Vaega maoti tau Malosiaga, Suavai mamā ma Suavai lafoa'i, Felaua'iga, ma Feso'otaiga fa'atekonolosi, o le a galulue so'oso'otauau ai ma ana Paaga fesoasoani mo le atiina'e. E \$880,000 talā ua fa'atatauina i lalo o le Matagaluega o Aoga ma Aganuu, ina ia mautinoa le fa'asopolia o aoga uma a le Malo, i auaunaga fa'atekonolosi.

O se tasi o naunautaiga o nei atiinae tetele, o le faaleleia lea o auala gālue i totonu o nu'u ma afioaga, aemaise lava i nofoaga o lo'o faigata ona uia. Ua fa'amatu'uina atu ai le \$2 miliona talā mo le fausia o auala gālue e le Pulega o Fela'ua'iga i le Lauele'ele, e fa'afaigofie ai femalaga'iga a le mamalu o le atunu'u.

O nei atiina'e mo le fa'aleleia o auaunaga mo tagata lautele e aofia ai le suavai, eletise, auala ma feso'otaiga faatekonolosi, e mautinoa ai avanoa tutusa mo tagata uma ma fa'afaigofie ai feso'otaiga a o tatou aiga. O le fausia ai o taligalu malolosi, fa'aaogaina o malosiaga fa'afouina, aemaise le fa'aaogaina tatau o eleele, o le a puipuia ai o tatou tagata ma lo tatou si'osi'omaga aua tupulaga fai mai.

4. Fa'atupulaia le Si'itia o le Tamaoaiga ma Fefa'atauaiga

O le puleaina ma le fausiaina o se tamaoaiga maua'a, o lo'o avea pea lea ma fa'atumutumuga o taumafaiga a le Malo mo lona atiina'eina.

O Tesema 2025 ua fua fuaina e fa'ama'ea ai le Maketi i Savalalo. O le a si'itia ai nisi avanoa mo le au fai pisinisi laiti ma fefa'atauaiga, ma fesoasoani ai i le sao o le unaia o le tamaoaiga. Ua ogatasi lea ma le

manulauti a le Malo, ina ia fa'aauauina pea lana faigapa'aga ma Vaega Tumaoti.

O loo fa'aauau pea ona unaia e le Malo atiina'e tau fa'atoaga fa'apea avanoa mo le auina atu o fua o fa'atoaga i atunu'u i fafo. Ua iai le fa'amoemoe, o le a fa'amae'aina le fausiaina o le Fale Tapena Oloa i Atele (Packhouse) i le masina o Tesema 2025, fa'apea ma le fa'aaogaina o a tatou masini tetele mo fa'atoaga faipisinisi, o lo'o i le Matagaluega o Fa'atoaga ma Faigafaiva, i lalo o le Poloketi fesoasoani a Saina (China Samoa Agricultural Mechanization Project). Ua iai fo'i loli fou e lua e feavea'i ai lafu manu fa'apea ma le taavale e iai le masini fasimanu e fesoasoani atu ai le Matagaluega o Fa'atoaga ma Faigafaiva, i le mamalu o le au fai lafumanu fa'apea itumalo o le a fa'atinoina a latou atiina'e tau fa'atoaga i lalo o le Polokalame mo le Atiina'e o Itumalo.

E \$16 miliona talā se vaegatupe e fa'aagaga mo nonogatupe e mama tului mo faipisinisi ma tagata lautele, e aofia ai le \$10 miliona talā e tuuina atu i le Faletupe o Atiina'e a Samoa e fesoasoani i fai pisinisi gaosi oloa, pisinisi tau faatoaga ma auunaga tau i tagata tafafao maimoa mai fafo. O le isi \$6 miliona talā o le a tuuina atu e ta'i \$3 miliona talā mo le Ofisa mo Pisinisi Laiti ma le Faletupe o Atiina'e a Samoa e fa'atupulaia ai avanoa mo faipisinisi laiti i nonogatupe e māmā le tului. O lo'o fa'aauauina fo'i le fesoasoani a le Malo e tauala atu i le Ofisa mo Atiina'e o Pisinisi Laiti, mo le fa'amaoniga o nonōgātupe (loan guarantee scheme) mo 'au faipisinisi laiti uma.

O le fa'alauteleina o vaegatupe ma maketi talafeagai e agavaa ai o tatou tagata, o le a tatalaina ai le avanoa mo le atiina'eina o taleni e aofia ai mea taulima, musika ma talatuu. O le a fesoasoani lea i le fa'atupulaia o oloa gaosi ma tupe maua.

Ina ia fesoasoani i le atina'eina o pisinisi fa'apea le fa'alauteleina o a'ua'unaga mo fefa'atauiga, o le a si'itia tupe fesoasoani a le Malo mo le Ofisa o Atiinae o Pisinisi Laiti ma le Fa'alapotopotoga mo Faipisinisi Alamanuia o Samoa.

5. Toefuataina o Ofisa ma Auaunaga a le Malo

O se tasi o matafaioi tāua o lo’o silasila mamao ai le Malo, o le fa’amalosia lea o pulega lelei. O lenei Tala o le Tupe, o le a vaeluaina ai matafaioi o le Matagaluega o Tiute ma Tupe Maua, ma avea ai o le Matagaluega o Tiute, ma le Matagaluega mo Tupe Maua, ina ia ta’atia ma maioio lelei ai o latou tiute tauave. O le a aloaia ai fo’i le fa’atuina o le Pulega o Oloa Auina atu i Fafo o Samoa, o se Fa’alapopototoga Tumaoti na te fa’alauiloaina ma una’ia le atiina’e o oloa auina atu i atunu’u i fafo.

O le a fa’ama’apeina fo’i le Fa’alapopototoga o Eleele a Samoa, ma o le a tu’ufa’atasia ana galuega tauave i totonu o le Matagaluega o Eleele ma Fua Fanua. E fa’apea foi ma le Pulega o Fale ma Malae Ta’alo a Samoa, o le a tu’ufatasia i lalo o le Matagaluega o Ta’aloga ma Alagaoa mo le Fiafiaga o Tagata.

Ae le gata i lea, o le a fa’aauau pea ona iloilo ma fetu’una’i e le Matagaluega o Tupe, fa’ailoilo o fua fa’atatau o galuega fa’atino, e va’ava’alua lea ma le toefuata’ina o tulafono, e taula’i i le fa’afouina o taiala fa’atonutonu ma le fa’aleleia atili o Pulega. O nei fuafuaga o le a mafai ai ona iloa le talafeagai o Faiga fa’avae a le Malo. Ua maitauina fo’i le aga’i i luma o le mulimulitaia e Matagaluega ma Ofisa o faiga fa’avae tetele a le Malo, e aofia ai le Fa’ava’a o le Fa’ata’atiaga o Fuafuaga a le Malo ma le Fa’ava’a mo le Puleaina lelei o Aseta. O lo’o fa’aleleia fo’i sisitema fa’atekonolosi ina ia mafai ai ona fa’amautu fa’amaumauga a le Malo aua le mata’ituina o le fa’aaogaina o tupe ma ona taunuuga.

O pulega mautu, o le ogatotonu lea o se tamaoiga mauaa. O le tatou aganuu, faatuatua ma le faasinomaga, e limataitaiina ai le ola tautua ma le galulue fa’atasi, auā se Samoa ia maopoopo.

V. OTOTOOGA O LE TALA O LE TUPE

Lau Afioga I le Fofoga Fetalai ma Sui Usufono,

O le a ou ‘otoina atu loa vaega uma o le Tala Fa’atatau Autū o le Tupe mo le Tausaga Fa’aletupe 2025/26:

<u>Tupe Maua</u>		\$ 1,030,684,101
Tupe Maua Masani	\$ 866,929,659	
Tupe e Faameaalofa mai Fafo	\$ 163,754,442	
<u>Tupe Faaalu</u>		\$ 1,241,535,754
Tupe Alu Faale-Tulafono	\$ 158,658,435	
Polokalame o Tupe Alu	\$ 921,251,553	
Tupe Faaalu Le Fuafuaina	\$ 27,637,547	
Tupe Faaalu mo Atiinae	\$ 133,988,219	
<u>Faasiliga o Tupe Alu I Tupe Maua</u>		-\$ 210,851,653
Faatupeina mai:		
Tupe Fesoasoani Tuu Sao mo le		
Tala o le Tupe	\$ 132,394,868	
<u>Fesuiaiga o Tinoitupe a le Malo</u>		-\$ 78,456,784

O le aotelega o le Tala o le Tupe mo le Tausaga Fa'aletupe 2025/26, o lo'o fa'amauina ai se fa'asiliga o tupe alu i tupe maua e \$210.9 miliona talā, e tusa lea ma le 3.5 pasene o le tamaoaiga, i lalo o le Auivi o Fa'amaumaga o Tupe a le Malo po'o le GFS.

VI. FA'AVAE O TUPE MAUA

Lau Afioga I le Fofoga Fetalai,

O lenei Tala o le Tupe o lo'o fa'aauau pea ona atagia ai le naunautaiga a le Malo i le fa'atumauina o tulaga mautū o tupe, e ala lea i le lē si'itiaina o lafoga fa'aopoopo i luga o oloa ma auaunaga (VAGST) ma lafoga i luga o tupe maua (Income Tax).

E tumau pea le una'ia o Tupe Maua a le Malo e tauala atu i le mulimulitaia o taiala ma faiga fa'avae, o loo fa'amalosia e le Matagaluega mo Tupe Maua ma le Matagaluega o Tiute. O nei taumafaiga ina ia mautinoa o lo'o ausia e tagata totogi lafoga o latou matafaioi, a'o

malupuipua pea tupe maua a le Malo e fesoasoani mo le tu'uina atu o auaunaga ma le fa'atinoaina o atiina'e.

O lenei Tala o le Tupe ua fa'amauiaina ai le siitia maua o tupe maua mai tupe faasili mai tupe mamā a Fa'alapotopotoga a le Malo, e aofia ai le \$1 miliona tala mai le Samoa Airways mo tausaga faaletupe e 3 (2023 - 2025) ma le \$12 miliona tala mai le Pacific Forum Line (PFL) mo tausaga faaletupe e 4 (2021 - 2024). O nei tupe maua sa tauaaina mai i totonu ole kuata muamua ole tausaga fa'aletupe 2025/26. O vaegatupe fa'amauiaina mai le PFL, ua atagia ai le ausia o faiga fa'apa'aga ma le Neptune Pacific Line, sa fa'avaeina i le tausaga 2014 talu ona faatau motu e le Malo le kamupani i le 2012, mo le fa'aleleia o auaunaga o vaa ma fefa'atauaiga i le atu Pasefika.

O le aso 1 Ianuari 2026, o le a aoina ai le lafoga mo Otaota Lafoa'i (Waste Levy) i luga o oloa e aofia ai fagu uga, atigi apa alamini ma taavale. O lenei fua fa'atatau, e fa'amalosia ai taumafaiga mo le va'ava'aia lelei o otaota lafoa'i, fa'aitiitia le fa'atama'iaina o le siosiomaga ma le malupuipua o punaoa fa'alenuma mo tupulaga faimai.

VII. GALUEGA FA'ATINO MA ATI'INA'E O LO'O AVE IAI LE FA'AMUAMUA

Lau Afioga i le Fofoga Fetalai ma Sui Mamalu o le Palemene,

O le aotelega o tupe fa'aalu mo le tausaga fa'aletupe 2025/26, o lo'o fuafuaina i le \$1.24 piliona talā. O lenei aofaiga o lo'o aofia ai ma tupe fa'atatauina mo poloketi e fa'atupeina mai Pa'aga mo Atiina'e, o lo'o atagia ai se siitaga e tusa lea ma le 7 pasene o tupe fa'aalu o lo'o fuafuaina.

Lau Afioga i le Fofoga Fetalai,

O le a ou 'auiliiliina atu loa vaegatupe ua fa'atatauina mo Matagaluega ma Fa'alapotopotoga ta'itasi, mo le tausaga fa'aletupe 2025/2026:

1. Matagaluega o Fa'atoaga ma Faiga Faiva - \$22,984,980

- Galuega Fa'atino a Matagaluega - \$13,624,350
- Galuega Fa'atino Tuuina atu i isi Vaega - \$6,044,865, ma e aofia ai le,

- Fa'alapotopotoga o Suesuega Fa'asaïenisi a Samoa - \$5,654,865
 - \$200,000 - Sosaiete mo le Puipuia o Manu
 - \$150,000 - Fa'alapotopotoga mo le Atiina'eina o Pisinisi a Tina ma Tama'ita'i
 - \$20,000 - Asosi o Faifa'atoaga o Samoa
 - \$20,000 - Asosi a Tautai o Samoa
 - Galuega e Avea ai ma Sui o le Malo - \$3,315,765
- 2. Matagaluega o Pisinisi, Alamanuia ma le Leipa - \$21,004,417**
- Galuega Fa'atino a Matagaluega - \$5,913,290
 - Galuega Fa'atino Tuuina atu i isi Vaega - \$12,720,000, e aofia ai le,
 - Fesoasoani mo le Ofisa o Tagata Tafafao mai Fafo - \$11,430,000
 - Fa'alapotopotoga o le Aufaipisinisi Alamanuia o Samoa - \$550,000
 - Ofisa mo le Atinaega o Pisinisi Laiti - \$450,000
 - Fa'alapotopotoga o Pisinisi Gaosi Oloa - \$100,000
 - Asosi o Pisinisi Faletalimalo a Samoa - \$100,000
 - Fesoasoani mo le Asosi a Tagata Tafafao Maimoa mai Fafo - Savaii - \$50,000
 - Fesoasoani mo le Fa'alapotopotoga mo Pisinisi a Salafai - \$20,000
 - Fesoasoani mo le Asosi a le Au Faimamanu a Samoa - \$20,000
 - Fesoasoani mo le Asosi o Tagata Faigaluega - \$20,000
 - Galuega e Avea ai ma Sui o le Malo - \$2,371,127
- 3. Matagaluega o Fesootaiga ma Fa'amatalaga Fa'atekonolosi - \$11,973,261**
- Galuega Fa'atino a Matagaluega - \$5,759,224
 - Galuega Fa'atino Tuuina atu i isi Vaega
 - Ofisa o le Pule Fa'atonu - \$3,201,250
 - Galuega e Avea ai ma Sui o le Malo - \$3,012,786
- 4. Matagaluega o A'oa'oga ma Aganuu - \$134,407,987**
- Galuega Fa'atino a Matagaluega - \$85,489,053

- Galuega Fa'atino Tuuina atu i isi Vaega \$41,783,570, e aofia ai le,
 - Iunivesite Aoao a Samoa - \$18,083,570
 - Pulega o Fa'ailoga ma Tusi Pasi Tauloa o Samoa - \$5,000,000
 - \$18,500,000 - Fesoasoani a le Malo mo Aoga
 - \$100,000 - Asosi mo Tagata e po le vaai
 - \$100,000 - Asosi o Tagata Fa'ailo Upu i le Gagana Faitaga a Samoa
 - Galuega e Avea ai ma Sui o le Malo - \$7,135,364
 - \$1,500,000 mo le Polokalame e Siitia ai Faailoga Tauloa mo Faiaoga
 - \$880,000 mo le Fesoasoani Tau Initaneti mo Aoga a le Malo
- 5. Matagaluega o Taaloga, Alagaoa mo le Fiafiaga o Tagata - \$11,160,668**
- Galuega Fa'atino a Matagaluega - \$4,075,531
 - Galuega Fa'atino Tuuina atu i isi Vaega
 - Pulega o Fale ma Malae Taalo a Samoa - \$380,000
 - Galuega e Avea ai ma Sui o le Malo - \$6,705,137
 - \$6,000,000 mo le Fesoasoani i Atina'e o Asosi eseese o Taaloga
- 6. Matagaluega o Tupe - \$132,814,395**
- Galuega Fa'atino a Matagaluega - \$20,542,865
 - Galuega e Avea ai ma Sui o le Malo - \$112,271,530 e aofia ai le,
 - \$52,500,000 mo le Penisiona mo Tagata Matutua ma Fa'amanuiaga mo i latou e iai a'afiaga tumau o le soifua
 - \$200,000 mo le Faalapotopotoga o Komiti Faatonu
- 7. Matagaluega o le Va-l-Fafo ma Fefa'atauaiga - \$31,881,708**
- Galuega Fa'atino a Matagaluega - \$28,339,024
 - Galuega Fa'atino Tuuina atu i isi Vaega
 - Pulega o Oloa Auina atu i Fafo a Samoa - \$1,237,980
 - Galuega e Avea ai ma Sui o le Malo - \$2,304,704

8. **Matagaluega o le Soifua Maloloina - \$170,675,414**
 - Galuega Fa'atino a Matagaluega - \$124,757,154
 - Galuega Fa'atino Tuuina atu i isi Vaega - \$12,650,000
 - Fa'alapotopotoga Fa'avae Tau Fatu Ga'o o Samoa - \$12,000,000
 - \$200,000 - Falemai mo Fa'amai le Pipisi
 - \$100,000 - Koluse Mumu
 - \$100,000 - Sosaiete o le Kanesa i Samoa
 - \$100,000 - Fesoasoani mo le GOSHEN
 - \$100,000 - METI
 - \$50,000 - Fa'alapotopotoga mo le Soifua Manuia o Aiga
 - Galuega e Avea ai ma Sui o le Malo - \$33,268,260 e aofia ai le,
 - \$12,000,000 mo le Polokalame o le auina atu o Gasegase i Atunuu i Fafo

9. **Matagaluega o Fa'amasinoga ma le Fa'afoeina o Tulaga Tau Fa'amasinoga - \$20,877,003**
 - Galuega Fa'atino a Matagaluega - \$18,337,011
 - Galuega e Avea ai ma Sui o le Malo - \$2,539,992 e aofia ai le,
 - \$450,000 mo le Fesoasoani mo Auaunaga Faaloia

10. **Matagaluega o Punaoa Fa'alenuma ma le Siosiomaga - \$37,283,247**
 - Galuega Fa'atino a Matagaluega - \$13,632,367
 - Galuega Fa'atino Tuuina atu i isi Vaega - \$100,000
 - \$50,000 - Fa'alapotopotoga a Samoa ma Tokelau mo le toe fa'aogaina o otaota
 - \$50,000 - Fa'alapotopotoga a Samoa mo le Puleaina ma le toe Fa'aogaina o otaota lafoai
 - Galuega e Avea ai ma Sui o le Malo - \$23,550,880 e aofia ai le
 - \$10,000,000 o Tau i mo le goto o le vaa Manawanui i Safata
 - \$4,786,274 mo Konekarate mo le Aoina o Otaota i Tua ma Taulaga
 - \$3,400,000 mo le Tau i mo Meatotino Faaleagaina i le Faaletonu o le Eletise

- 11. Matagaluega o Eleele ma Fuafanua - \$13,509,491**
- Galuega Fa'atino a Matagaluega - \$7,887,488
 - Galuega e Avea ai ma Sui o le Malo - \$5,622,003
 - \$850,000 mo le Auala mo Fanua Lisi a le Malo
- 12. Matagaluega o Leoleo, Falepuipui ma le Toefuataina - \$63,635,872**
- Galuega Fa'atino a Matagaluega - \$43,513,960
 - Galuega Fa'atino Tuuina atu i isi Vaega
 - **Pulega o Tineimu ma Fa'alavelave Tutupu Fa'afuasei - \$14,978,547**
 - Galuega e Avea ai ma Sui o le Malo - \$5,143,364
- 13. Matagaluega o le Palemia ma le Kapeneta - \$11,379,722**
- Galuega Fa'atino a Matagaluega - \$8,081,140
 - Galuega e Avea ai ma Sui o le Malo - \$3,298,583 e aofia ai le,
 - \$500,000 mo **Tapenaga mo le Faamanatuina o le Tutoatasi**
 - \$100,000 mo le **Faalapotopotoga Tausi mo Tagata ua Faafo'i Mai**
- 14. Matagaluega o Tiute - \$9,817,243**
- Galuega Fa'atino a Matagaluega - \$8,599,330
 - Galuega e Avea ai ma Sui o le Malo \$1,217,913
- 15. Matagaluega mo Tupe Maua - \$9,136,416**
- Galuega Fa'atino a Matagaluega - \$6,812,871
 - Galuega e Avea ai ma Sui o le Malo - \$2,323,545
- 16. Matagaluega o Tina ma Tamaitai, Atiinae o Nu'u, Afioaga ma Agafesootai - \$107,167,829**
- Galuega Fa'atino a Matagaluega - \$12,458,593
 - Galuega e Avea ai ma Sui o le Malo - \$94,709,236, e aofia ai le,
 - \$91,800,000 mo le **Polokalame mo Atiinae o Itumalo**
 - \$1,000,000 mo le **Polokalame mo le fausiaina o fale mo tagatanuu lima vaivai**
 - \$200,000 mo le **Fesoasoani i Aoaoga mo Faalapotopotoga Tumaoti**

- \$100,000 mo Polokalame Tau Aoaoga e Taofia ai Sauaga mo Faalapotopotoga Tumaoti
- \$200,000 mo le Fesoasoani mo le Toomaga mo e Puapuagatia
- \$100,000 mo le Mapuifagalele
- \$100,000 mo le Mapuipulotu

17. Matagaluega o Galuega, Felauaiga ma Atiinae Eeseese - \$58,220,512

- Galuega Fa'atino a Matagaluega - \$6,910,431
- Galuega Fa'atino Tuuina atu i isi Vaega - \$50,571,697, e aofia ai le,
 - Pulega o Fela'ua'iga i le Laueleele - \$34,521,697
 - \$5,000,000 - Pulega o le Suavai - CSO -
 - \$5,000,000 - Fa'alapotopotoga o Malosiaga tau Eletise - CSO
 - \$5,050,000- Pulega o le Suavai - Budget Support
 - \$1,000,000 - Pulega o Malae Vaalele - Mea Faigaluega mo le Saogalemu
- Galuega e Avea ai ma Sui o le Malo - \$738,384

18. Matagaluega mo Fa'alapotopotoga a le Malo - \$2,952,421

- Galuega Fa'atino a Matagaluega - \$2,388,528
- Galuega e Avea ai ma Sui o le Malo - \$563,893

19. Ofisa o le Loia Sili - \$5,840,330

- Galuega Fa'atino a le Ofisa - \$5,005,693
- Galuega e Avea ai ma Sui o le Malo - \$834,637

20. Ofisa o le Pule ma le Suetusi Sili - \$4,349,975

- Galuega Fa'atino a Ofisa - \$3,755,924
- Galuega e Avea ai ma Sui o le Malo - \$594,051

21. Ofisa o le Komesina o Faiga Palota - \$3,907,060

- Galuega Fa'atino a Ofisa - \$3,646,650
- Galuega e Avea ai ma Sui o le Malo - \$260,410

22. **Ofisa o le Failautusi o le Fono Aoao Faitulafono - \$9,171,376**
 - Galuega Fa’atino a Ofisa- \$7,909,838
 - Galuega e Avea ai ma Sui o le Malo - \$1,261,538
23. **Ofisa o le Komesina o Sulufaiga - \$1,870,583**
 - Galuega Fa’atino a Ofisa - \$1,612,737
 - Galuega e Avea ai ma Sui o le Malo - \$248,846
24. **Komisi o Tagata Faigaluega a le Malo - \$16,926,493**
 - Galuega Fa’atino a Ofisa - \$5,450,405
 - Galuega e Avea ai ma Sui o le Malo - \$11,476,088, e aofia ai le,
 - \$10,000,000 mo le Polokalame o Sikolasipi a le Malo
 - \$100,000 mo Sosaiete Eeseese tau i Tomai Faapitoa
25. **Ofisa o Fuainumera Fa’amauina - \$6,795,567**
 - Galuega Fa’atino a Ofisa - \$4,846,987
 - Galuega e Avea ai ma Sui o le Malo - \$1,948,580
26. **Komisi ole Toe Fuataiga o Tulafono - \$1,507,587**
 - Galuega Fa’atino a le Ofisa - \$1,170,628
 - Galuega e Avea ai ma Sui o le Malo - \$336,959

VIII. TUPE FA’AALU LĒ FUAFUAINA

Lau Afioga I le Fofoga Fetalai,

E \$27.6 miliona talā, e tusa ma le 3 pasene o polokalame o tupe alu, o lo’o fa’aleoleo mo ni vaega e le’i fuafuaina. O le fa’aaogaina o lenei vaegatupe e mo na’o ni tulaga matuiā ma fa’alavelave tutupu fa’afuase’i.

IX. TUPE ALU I ATIINA'E

Lau Afioga I le Fofoga Fetalai,

E \$163.8miliona talā le aofaiga o tupe fa'ameaalofa o lo'o fuafula e tu'uina mai mo le fa'atinoga o atiina'e tetele a le Malo ma fesoasoani tu'usa'o mo vaega maoti. O le pa'ū maualalo ua atagia ai le fa'aitiitia o le lagolago a nisi o tatou Pa'aga mo Atiina'e, i le mae'a ai o le taligamalo mo le Fonotaga a Fa'auluuluga a Malo o Taupulega (CHOGM), ma nisi o atiina'e tetele ua fa'amaea i le tausaga fa'aletupe 2024/25 e aofia ai le Polokalame a le Pasefika mo le tali atu i Suiga o le Tau, Poloketi mo Fa'atoaga ma Faigafaiva; ma le Poloketi mo le Tapu'eina o le Suavai i Vaisigano.

E fa'apea foi ona fa'aauau fesoasoani tu'usa'o mo Vaega maoti o le Soifua maloloina, Suavai, Fa'atoaga ma faigafaiva, ma le fesoasoani amata mo le vaega maoti o A'oa'oga. O nei fesoasoani e atagia ai le lagolago a paaga o atinae i vaega fa'amuamua mo atinae a le Malo. Mo le vaega maoti o le Siosiomaga, e \$10 miliona talā se vaegatupe ua tuuina mai e le Malo o Niu Sila e fai ma tau mo aafiaga o le gataifale o le itumalo o Safata, ona o le vaa o le Manawanui sa goto ai.

E avea ai lenei avanoa e momoli ai le fa'afetai a le Malo mo lea fesoasoani taua ma nisi fesoasoani o lo'o fuafulaina mai, aemaise ai o le manatuaina ile asō, 6 Oketopa, o le tasi tausaga talu ona tulai mai lenei fa'alavelave matautia ua aafia ai le gataifale ma le siosiomaga e fa'amoemoe iai nuu ma alalafaga.

E iai foi fesoasoani mai i paaga e tusa lea ma le \$82.1 miliona talā e tu'uina sa'o atu i fa'alapotopotoga tumaoti, alalafaga, ma nisi o ofisa o le Malo e fa'atinoina ai nisi o atiina'e ua ave iai le fa'amuamua a le Malo ma afioaga.

Lau Afioga ile Fofoga Fetalai,

O lo'o galulue foi le Malo ma ana paaga e fa'amautu ma feutaga'i mo fesoasoani e fa'atino ai nisi o atina'e fa'amuamua a le Malo ua amata ona tapenaina mo le tausaga fa'aletupe 2025/26 i Vaega maoti nei; Felauaiga ma Atiina'e tetele, Suavai ma vai lafoa'i, Soifua maloloina, A'oa'oga, Fesootaiga, Malosiaga, Siosiomaga, Tagata tafafao maimoa mai fafo, Tupe, Fefa'atauaiga, pisinisi ma oloa gaosi, ma Fa'atoaga ma faigafaiva.

X. UPU FA'AI'U

Lau Afioga i le Fofoga Fetalai ma Sui o le Fono,

A'o fa'agasolo ai le tausaga mulimuli o le fa'atinoina o le Taiala mo le Lumanai Manuia o Samoa, ma le ulufale mai o le paeaiga lona XVIII a le Fono Usu a Samoa, o le Tala o le Tupe ua fa'ata'atia atu, e atagia ai o tatou naunautaiga tu'ufa'atasi mo le atunu'u. O lenei Tala o le Tupe, e lē na o se fuafuaga o tupe, ae o se fa'ailo o lo tatou lotonuu ina ia fausia fa'atasi se Samoa e manuia uma ai aiga, nuu ma itumalo. O se Tala o le Tupe sa ta'ialaina i futia ua sola, ina ia fa'amaua'a ai le asō, ma fa'amausalī ai se lumana'i mo a tatou alo ma fanau.

E lagolagoina fo'i e lenei tapenaga le malupuipua o le lumanai manuia o Samoa mai so'o se lu'itau, e tauala atu i fuafuaga alualu mamao. O lo'o fa'amausalīina ai le ta'utinoga a le Malo, i le tausiga lelei o le tamaoaiga, atiina'e gafataulimaina, ma se pulega e taula i faiga faavae manino ma fa'amaoni.

Lau Afioga i le Fofoga Fetalai,

E avea lenei avanoa e fa'aleo ai le agaga ma le loto fa'afetai tele i tagatanuu o Samoa o lo'o tautua i Samoa nei ma atunuu e mamao, mo la outou fa'atuatua i lenei Malo fou, ua faafouina ai lo matou naunautaiga e tautua ma le faamaoni ma le alofa.

E lē itiiti foi le fa'afetai ia tatou paaga o atinae o lo'o fesoasoani mai i le fa'atinoina o atinae mo Samoa ma ona tagata. E le fa'agaloina le sao taua o nuu ma alalafaga, ekalesia, fa'alapotopotoga tumaoti ma vaega tumaoti i le atiina'eina o Samoa. O nei faigapaaga o lo'o fesoasoani tele e unaia le fa'atinoga o auaunaga, le fa'aleleia o tomai ma agavaa, ma le fa'amausalīina o atiina'e i vaega maoti uma o le tamaoaiga.

Ao tatou agai atu i le lumana'i, ia tatou folau ma le lotogatasi ma le fa'atuatua. Ia avea lenei Tala Faatatau Autu o le Tupe, o se fa'amanuiaga mo le atiina'eina o avanoa e lalagaina ai se tamaoaiga maua'a.

Lau Afioga i le Fofoga Fetalai,

E avea lenei avanoa e fa'amanuia atu ai le Aso Fa'apitoa mo Faiaoga i le Lalolagi, e pei ona fa'amanatuina i le aso 5 Oketopa 2025 ma lenei vaiaso

atoa i Samoa. Matou te fa'afetaia le galuega fita a faiaoga uma, mai lava i aoga amata seia oo atu i aoga maualuluga. Ia tupu pea le naunau e tautua ma le alofa auā augatupulaga fai mai. Malo le tautua atunuu.

E fai fo'i lo'u leo ma sui o le Malo, e momoli atu ai fa'amanuiaga mo le Aso Sa Pa'epa'e o le Fanau. O upu a le fai Salamo "O fanau, o le tofi lea mai le Alii, o e ua fanau mai, o le tau'i lea mai ia te ia."

Ia alofa mai le Atua o 'Au, e tapasāina le tatou savaliga i lenei tausaga ma lenei Paea'iga lona XVIII a le Palemene o Samoa.

Lau Afioga ile Fofoga Fetalai,

Ou te tu'uina atu le Tala Fa'atatau Autū o le Tupe 2025/26 i le Palemene o Samoa mo la outou fa'atofāla'iga.

Soifua ma ia Manuia.
